

## పేతురు రాస్తా రుండి ఉత్త్రం

నెల్వ కిబిసినిక

యేసుప్రబుజ్ అపొస్తుడు ఆతి పేతురు యా ఉత్త్రం రాస్తాన్. పేతురు వన్ని బత్కు అందిదెజ్ డగు ఆతివలె యాక రాస్తాన్ ఇజి బయ్బిల్ వందిజ్ నెస్తికార్ వెప్పినార్. క్రీస్తు సకం 68 దు క్రీస్తు లోకాజ్ మాలెజ్ కిత్తి నీరో ఇని రోమ వరి పెరి రాజు పేతురుజ్ నపిస్తాన్ ఇజిబా బయ్బిల్ వందిజ్ నెస్తికార్ వెప్పినార్. యా ఉత్త్రమ్దు ఇనికెజ్ రాస్తాన్ ఇహిజ, అయ కాలమ్దు సోత్తిమహి తప్పు బోద నెస్పిసిని వరి వందిజ్ జాగర్త మండ్రు ఇజి వెప్పినాన్. యేసుక్రీస్తు మర్జి రెవ్న్ ఇజిబా వారు వెప్పిని వందిజ్ జాగర్త మండ్రు ఇజినాన్. దేవుణు కనికారమ్దాన్, గెణమ్దాన్ నెగ్గెండ పిరిదు ఇజి రాసినాన్.

1 యేసుక్రీస్తుజ్ పణి కినికాన్ ఆతి, అపొస్తుడు ఆతి సిమొను పేతురు రాసిని ఉత్త్రం. దేవుణు దయా దర్మమ్దాన్, రక్సిన్నికానాతి యేసు క్రీస్తుజ్ దయా దర్మమ్దాన్ గొ ప్పువిలవాతి నమకం మజి దొహ్దాద్. మజి దొహ్కొత్తి లెకెండ అయ గొప్ప విలువాతి నమ్మకం దొహ్కొత్తి మన్ని వరిజ్ యాక రాసిన.

2 మిజి దేవుణు దయాదర్మం, నిపాతి, నండో వంతుజ్ ఆజి మనీద్. ఎలాగ ఇహిజ దేవుణుదిజ్ నెసిని దన్నితాన్ వాని గెణమ్దాన్, ప్రబువాతి క్రీస్తుజ్ నెసిని దన్నితాన్ వాని గెణమ్దు పిరిదు.

దేవుణు ఎర్లిస్తి లోకుర్ ఇజి రుజుప్ కిదెజ్.

3 దేవుణు వన్ని గొప్ప జాయ్దాన్ నెగ్గి గుణమ్దాన్ మజి వన్ని వందిజ్ ఏర్పాటు కిత్తాన్. దేవుణు వన్ని గొప్ప సత్తదాన్ మా బత్కుదిజ్ కావల్సికెజ్ విజు సితాన్. దేవుణుదిజ్ బక్తి మన్ని మన్ను సితాన్. యాకెజ్ విజు దేవుణుదిజ్ నెసిని దన్నితాన్ మణి తొహ్కె.

4 యా గొప్ప జాయ్‌దాన్ నెగ్గి గుణమ్‌దాన్ దేవుణు వన్ని ఒద్దె విలువతి ఒట్టుజ్ సిత మనాన్. ఎందనిజ్ ఇహిజ అయ ఒట్టుజణిజ్ దేవుణు గుణం కల్లిజి మండ్రెజ్ అట్నాట్. యా లోకమ్‌దు సెన ఆసదాన్ మజి సెఎణ్ కిని విజు వన్యా బాణిజ్ తపై ఆదెజ్ అట్నాట్.

5-7 అందెజె మీరు నిని వన్యా వందిజ్ అక్కెజ్ దోహ్‌క్కి లెకెండ్ కష్టబాడిజి మండ్రు. ఇనికెజ్ ఇహిజ మీ నమకం వెట నెగ్గి గుణమ్‌కు కూడెఱ్ఱు. నెగ్గి గుణమ్‌కు వెట గెణం కూడెఱ్ఱు. గెణం వెట మన్ను అణసె ఆజి మంజిని గుణం కూడెఱ్ఱు. దన్ని వెట విజు దనిజ్ ఓరిస్తెజ్ మని బుద్ది కూడెఱ్ఱు. ఓరిసినిదని వెట దేవుణు వందిజ్ బక్తిమని మన్ను కూడెఱ్ఱు. దేవుణు వందిజ్ బక్తి మన్ని మన్ను వెట మహి నమ్మితి వరిజ్ ప్రేమిసిని దన్ని వెట విజేరిజ్ ప్రేమిసిని మన్ను కూడెఱ్ఱు.

8 యా గుణమ్‌కు మీ బత్కుదు పిరిజి ఒద్దె నిండ్రెజి వాతిజ యేసు క్రీస్తుజ్ పుర్తి నెస్సి దనిజ్ అక్కెజ్ పణి కినె. బండెజ్ ఆని వరి లెకెండ్ ఆఇదెల్లె. పణిదిజ్ రెఇ వరి లెకెండ్ మన్‌ఇదెల్లె.

9 యా గుణమ్‌కు కల్లిజి నిండ్రెజి మనికార్ గుడ్డి వరి లెకెండె, దూరమ్‌ద్దు మనికెజ్ తోరెండె ఆనె. ముందాల్ కితి పాపమ్‌కాణిజ్ నొరె ఆతాప్ ఇజి పోసినార్.

10 అందెజె నా తంబెరుజాండె, దేవుణు మిజి ఎర్లిసి, వన్ని లోకుర్ ఇజి కూక్కి ఎర్లిస్తాన్. మీరు అక్క ఒదె నెగ్గెండ రుజాప్ కిదెజ్. నిన్ని పణిజ్ కినికిదెజ్ ఇహిజ ఎస్తవలెబా జార్‌జి అర్‌ఎండ నిల్లిదెర్.

11 యా లెకెండ్ మా ప్రబుని, మజి రక్సిస్సికాన్ ఆతి యేసుక్రీస్తు ఎల్లకాలం మంజిని రాజెమ్‌దు మజి గొప్ప మర్యాద సీజి కూడెఱ్ఱివలె, మజి సీని అవకాసం తక్కు ఆవద్.

**ప్రవక్తరు దేవుణు మాటెజ్ వెహ్తార్.**

12 అహిజ, ఏలు మీరు అస్తిమని దేవుణు వందిజ్ నిజమాతి యా సజతిజ్ మీరు బాగ నెసి కద్దివడ నిల్పి నిదెర్ గాని, మిజి నాను యా సజతిజి వందిజ్ ఎస్తివలెబ ఎత్తు కిబిస్తెజ్ తయార్ ఆజి మంజిన.

13 నాను సాని దాక యా సజతిజ వందిజ్ మిజి మరి మరి ఎత్తు కిబిసైజ్ నా బాజిత ఇజి నాను ఒడోబిజిన.

14 ఎందనిజ్ ఇహిజ, మా ప్రబు ఆతి యేసుక్రీస్తు నజి వెహ్తి లకెండ్ నాను యా బత్తు బెగినె డిసి సొండ్రెజ్ వలె ఇజి నెన్న.

15 మరి నాను సాతి సాహి వెనుక మీరు ఎస్తివలెబా యా సజతిజ్ ఎత్తుకిజి మంజిని వందిజ్ నాను నండో పణికిన.

16 ఎలాగ ఇహిజ, మా ప్రబువతి యేసు క్రీస్తుజ్ మని గొప్ప సత్తు వందిజ్, వాండ్రు మర్జి వాని వందిజ్ మిజి నెస్సిస్తి వలె, అక్క ఉండ్రీ కత సాన్తరం వలె అక్క ఉండ్రీ కత సాన్తరం వెహ్తి లెకెండ్ ఆవద్. గాని వాండ్రు ఎస్సా గొప్ప పెరికాన్ ఇజి మాపు కణకాణిజ్ సుడోతాపె, అక్కాదె మిజి వెహ్తాప్.

17 ఎలాగ ఇహిజ, గొప్ప మెరిస్తి జాయ్ కల్గితి మహిమ నిండ్రీతి మహి బాణిజ్ ఉండ్రీ జాటు వాతాద్. ఇనిక ఇహిజ, “వీండ్రు నాను నా నండో ప్రేమిసిని మరిన్. విన్ని ముస్కు నాను సర్ల ఆజిన. అయా మాటెజ్ బుబ్బాతి దేవుణు బాణిజ్ వాతివలె మరిసి ఆతి యేసుజ్ గొప్ప పేరు, మహిమ కల్గితాద్.

18 మాపు వన్ని వెట అయా పరిసుదం ఆతి గొరొణ్ ముస్కు మహివలె ఆగాసమ్దాన్ వాతి యా జాటు మాపె విహాప్.

19 మరి, ఒద్దె నిజమాతి మాటెజ్, ఇహిజ ప్రవక్తరు వెహ్తి మాటెజ్ మజి మన్నె. అక్కెజ్ మీరు జాగర్త విండ్రెజ్. ఉండ్రీ కస్తిమని దీవ జాయిదాన్ సికటిదు మనికెజ్ సుడోదెజ్ అట్నాట్. అయాలెకండ్నె ప్రవక్తరు వెహ్తి మాటెజ్ జాయ్ వానిదాక మీ గర్భమ్దు ఇడోదు. కోడిజామ్దు తోరె ఆని జాయ్ ఆని సుక్క మీ గర్భమ్దు సొనాద్.

20 విజు వన్నాజ్ ఇంక ముకెలం మీరు నెస్సిక ఇనిక ఇహిజ, ప్రవక్తరు రాస్తి మని మాటదు ఉండ్రీ మాటబా పరి సొంత ఆలోసనమ్దాన్ వెహ్తి లెకెండ్ వెహ్ఎతార్.

21 దేవుణు మాటెజ్ లోకు వన్నిజ్ ఇస్టం ఆతి వజ వెహ్తికెజ్ ఆఉ. గాని దేవుణు ఆత్మ సత్తుదానె దేవుణు మాటెజ్ లోకుర్ వెహ్తార్.

## 2

తప్పు బోద నెస్పిసిని వరిజ్ వాని నాసనం.

1 గాని అయ కాలమ్దు లోకు నడిఃమి తప్పు బోద నెస్పిసినికార్ బా మహార్. అయ వజనె మీ నడిఃమి తప్పు బోద నెస్పిసినికార్ వానార్. వారు ఇనిక కినార్ ఇహిజ వన్ని సొంత పాణం సీజి కొటి ప్రబుజ్ నెక్త పొక్కారె గొప్పు నాసనమ్దు ఒని ఆఇ బోదెజ్ డాప్పి నెస్పిసినార్. అయావజనె వరిజ్ వారె వెటనె వాని నాసనం తపె ఆజినార్.

2 నండొండార్ వీరు నెస్పితి సిగు ఆని పణిజ్ వెంజి ఆహె నడిఃనారలె. వరి సెన పణిజ్ సుడఃజి క్రిస్తుజ్ ని వాండ్రు నెస్పిస్తి నిజమ్తి దన్ని వందిజ్ లోకుర్ దూసిస్సార్లె.

3 యా తప్పు బోద వెహ్పికార్ డబ్బుదిజ్ గొప్పు ఆస ఆజి నిజం ఆఇ మాటెజాణిజ్ మిజి మొసెం కినార్. వరిజ్ ముందార్లెనే తీర్పు సీదెజ్ తయార్ ఆత మనాద్. వరిజ్ నాసనం తపెవండ వానాద్.

4 ఎలాగ ఇహిజ, పాపం కితి దూతారిజ్ డిఃన్ ఎండ తీర్పు వాని దాక ఇడఃదెజ్ దేవుణు వరిజ్ ఎలాకాలం సిసు మంజిని బాడిదు పొక్తాన్. సీకటి మని సాలం లోఇ తోహిస్త ఇట్టాన్.

5 మరి, పూర్బకాలమ్దు పాపం కిజి మహి లోకాజి సిక్స దాన్ తప్రిన్ ఎండ, దేవుణు వరి ముస్కు పెరి గడ్డ తపిస్తాన్. గాని నీతినిజాయితి వందిజ్ వెహ్పి మహి నోవాహుజ్ ని, వన్ని వెట మహి ఏడుగురుదిజ్ గడ్డదాన్ తపిస్తాన్.

6 మరి సొదొమ, గొమొర్ర ఇని పట్నమ్కాన్ మహికార్ పాపం కిజి మహిజ్ దేవుణు వరిజ్ తీర్పు సితండ్రె సిసుదాన్ అయ పట్నమ్కాజ్ సుహ్తాన్ దేవుణుదిజ్ ఇస్తం ఆఇ లెకెండ్ సెఇ పణి కిని వరిజ్ వాండ్రు ఇనిక కినాన్ ఇజి ఉండ్రీ గుర్తు లెకెండ్ వరిజ్ ఇడ్డాన్.

7 నీతి నిజాయితిదాన్ పణి కితి లోతు వన్ని సురుల జర్గిజి మహి గొప్పు సిగ్గు ఆతి పాపం పణిజ్ సుడఃజి గొప్పు బాద ఆజి మహిజ్ దేవుణు వన్నిజ్ గెల్పిస్తాన్.

8 ఎందనిజ్ ఇహిజ అయ నీతి మనికాన్ వరి గొప్ప సెజ పణిజ్ సుడఃజి అక్కెజ్ వెంజి రోజు వన్ని నెగ్గి మన్నుదాన్ గొప్ప బాద ఆజి మహాన్.

9 దేవుణు ముస్సు బక్తి మన్ని వరిజ్ వాని పరిసెజాణిజ్, వరిజ్ గెల్పిస్తెజ్ దేవుణు నెసినాన్. దేవుణు ఎద్రు నీతి నీజాయితి సిల్లెండ నడిఃని వరిజ్ సిక్కు సీజి తీర్పు దినమ్దాక ఇడ్డెజ్బా నెసినాన్.

10 సెజ ఆలోసనమ్దాన్ పుట్టి ఒడొఃల్ వందిజ్ మన్ని సెజ ఆసెజ్ వందిజ్ బత్తి.జి దేవుణు అతికారమ్దిజ్ లోజిఎండ దన్నిజ్ నెక్కిపొక్కి వరిజ్ సిక్కు సీదెజ్ దేవుణు ఇడ్డ మనాన్. యా తప్పు బోద నెస్సిసినికార్ గొప్ప గర్ర ఆజి ఇనిక కిదెజ్బా తయార్ అనికార్. వరి సొంత ఇష్టమ్దాన్ విజు కినార్. గొప్ప బమ్మ ఆతి వనక వందిజ్ సెజకెజ్ వెప్టెజ్బా తియెల్ ఆఇకార్ వీరు.

11 దేవుణు దూతార్ గొప్ప సత్తు మనికారె ఇహిజ్బా దేవుణు ముందాల్ వినక వందిజ్ వరిజ్ దూసీన్ఎర్.

12 గాని యా తప్పు బోద నెస్సిసినికార్, వారు నెన్ఇ వన్కా వందిజ్బా దూసలాడ్వార్. వారు బుద్ది కిదెజ్ ఆట్ఇ మూర్కతం మన్ని జంతుజ్ లెకెండె ఆలోసనం కిదెజ్ ఆట్ఎర్. వేట కినికార్ వనకాజ్ అసి సప్పి లెకెండె వీరుబా ముర్కతం మన్ని అడవి జంతుజ్ లెకెండె పాడాన సొనార్.

13 వారు కిజిని నాసనమ్దిజ్ వరిజ్ మర్జి నాసనం వాజినాద్. ఒడొఃల్ ఆస వందిజ్ సిగు అని ఇని పణిబా కిదెజ్ సర్ల ఆజి వేడెకానె అయా సెజ ఆసెజ్ సొన్నిసినార్. మీరు కిజిని ప్రేమ విందుజ లోఇ వారుబా కూడ్డి మజినార్. వారు మన్ను రుజ్ని లెకెండె ఉణిజి తింజి ఒడొఃల్దిజ్ సుకం కిబిసినార్. తెలాని పాతాదు మని మన సిగు తపిస్సి లెకెండె వీరుబా సిగు తపిసినార్.

14 బోద్కాజ్ సుడఃజి వనక వెట పాపం కిదెజ్ ఇజి ఆస ఆజి మంజినార్. పాపం కిదెజ్ మని ఆస ఎసెజ్బా డిఃన్ఎర్. ఇతాల్ అతాల్ మన్ను మన్ని వరిజ్ వారు ఆసెజ్ తోరిసి ఇఇసరి నడిఃపిసినార్. వరి వందిజె లాబం తప్పె ఆదెజ్ సుడఃజి మంజినార్. దేవుణు వరిజ్ సిక్కు సీనాన్.

15 వారు సరిఅతి బత్కు బత్కిఎండ, బెయెరి ఇని వన్ని పొటదికాన్ బిలాము ఇని వన్ని లెకెండ ఆత మనార్. ఎలాగ ఇహిజ తప్పు కిత్తి వందిజ్ దోహక్కి డబ్బు వందిజ్ ఆజి బిలాము సరి తప్ప సొహాన్.

16 గాని అయ బిలాము కితి సెజ పణిదిజ్ వాని గాడెదె అడ్డు కితాద్. మాటెజ్ నెసి అయ గాడెదె లోకు లెకెండ వర్గిజి బిలాము ఇని ప్రవక్త ఒడిబితి వెరి పణిదిజ్ అడ్డు కితాద్.

17 నిని బోద కినికార్ ఏరు సిలి ఊట లెకెండె, సుర గాలి ఎగ్రిసి ఒని మొసాప్ లెకెండె విరి వందిజ్ గొప్ప సీకటి మని బాడ్డి దేవుణు తయార్ కిత మనాన్.

18 ఎందనిజ్ ఇహిజ యా తప్పు బోద నెస్సినినికార్ పణిదిజ్ రెజ బడాయ్ మాటెజ్ వర్గిజి అయ మాటెజాణిజ్ వరి ఒడెల్ ఆసెజ్ సొస్సిస్తెజ్ సుడెజినార్. తపు సరి నడిని వరి లోఇహాన్ ఏలె తప్పె ఆతి లోకాజ్, వీరు మరి తప్పు సరి నడిపినార్.

19 ఇని దని అడ్డిబా మన్ఎండ పూర్తి విడుదల మన్నిబాన్ ఒనాప్ ఇజి వీరు వెప్పి మంజినార్. గాని వీరె నాసనం తపినిని పాప్ మదిజ్ తోహా ఆత మనార్. ఎందనిజ్ ఇహిజ ఒరెన్ ఇని దనిజ్ గెల్స్తెజ్ అట్ఎండ మంజినాండ్రె, దనిజె వెటిపణి మణిని వజ అడిగి మంజినాన్.

20 మా ప్రబుని, రక్కిన్నికాన్ ఆతి యేసు క్రిస్తుజ్ బాగ నెస్తి వెనుక, యా లోకమ్ది సెజ వన్కాణిజ్ తప్పె ఆతి వెనుక, మరి అర్తిజి అకెజ్ వన్నిజ్ అడిగి ఇట్టిజ వారు ముందాల ఆతిమహి దన్నిజ్ ఇంక ఒద్దె సెఇకార్ ఆనార్.

21 దేవుణు బాణిజ్ వాతి ఆడ్ర వరిజ్ ఒపజెపె ఆతి వెనుక అక్క తప్పి సొహార్. ఆహె తప్పిసొని దన్నిజ్ ఇంక అయ నీతి నిజాయితి మన్ని సరి వందిజ్ నెన్ఎండ మంజినిక ఇహిజానె వరిజ్ నెగ్గెత మహాద్ మరి

22 “నుకుడి: అది కక్కిక మరి మర్జి తింజినాద్”, “ఏరుదాన్ నొరె ఆతి పండ్రి మరి బుర్లదు నూడ్బాదెజ్ సొస్సినాద్”, ఇజి వెప్తి మని మాటెజ్ తప్పు సరిదు మప్తి సొహి విరి వందిజ్ నిజం ఆజినాద్.

## 3

ప్రబు మర్జి వాని దినం.

1 నాను ప్రేమిసినికిదెరా, తొలిత ఉండ్రీ ఉత్తం రాస్త. మీరు ముందల్ నెస్తిమన్ని వనకాజ్ ఎత్తు కిబిస్తెజ్ ఏలు నాను మిజి మరి ఉత్తం రాసిన. కల్తిసిల్లి మీ మన్సుదిజ్ ఉసార్ కిబిస్తెజ్ ఇజి యా రుండి ఉత్తమ్కు రాసిన.

2 దేవుణు ప్రవక్తరు పూర్బకాలమ్దు వెప్తి మాటెజ్, మరి మా ప్రబుని రక్సిస్తికానాతి యేనుక్రిస్తు మీ అపొస్తుడుర్ సిత్తి ఆడ్రెజ్ మిజి ఎత్తు కిబిస్తెజ్ ఇజి నాను ఆస ఆజిన.

3 ముకెలమాతి ఉండ్రీ సజతి మీరు అర్థం కిజి మండ్రు. ఇనిక ఇహిజ, కడెవెరి రోస్కాజ్ సెగొండార్ వెక్రిసికార్ వానార్. వారు పరి ఒడెఱ్లి సెఇ ఆసెజ్ సొన్నిసి మంజినార్. వారు మిజి లివల్ కినార్.

4 వారు ఇనిక వెహ్సార్ ఇహిజ, “వాండ్రు వానన్ ఇజి ఒట్టు కిత్తిత్తాన్గెదె. ఎసెజ్ వానన్లె? మా అనిగొగొర్ సాత సొహార్. గాని ఏలుదాక వాండ్రు వాదెజ్ సిల్లె. యా లోకం పుట్టిబాణిజ్ అసి విజు యా లెకెండ మనాద్, ఇని తేడ సిల్లెద్”, ఇజి వెహ్సార్.

5 గాని పూర్బకాలమ్దు దేవుణు వన్ని మాటదాన్ ఆగాసమ్దిజ్ బూమిదిజ్ తయార్ కిత్తాన్. యా బూమి ఏరుబాణిజ్ తయార్ ఆతాద్. ఏరు వెట తయార్ ఆతాద్ ఇజి నెస్తిమహికెజ్ వారు పొస్తెజె ఇజి సుడెఱ్జినార్.

6 వన్ని మాటదాన్ నె పెరిగడ్డ వాజి అయ ఏరుదాన్ అయావలె మహి లోకం విజు ముడుఱ్గితాదె పాడాతా సొహాద్.

7 దేవుణు అయా మాటదానె ఏలు మని ఆగాసమ్దిజ్ బూమిదిజ్ సిసుదాన్ నాసనం కిదెజ్ తీర్పు కిని రోజుదాక ఇట్టా మనాన్. దేవుణు వందిజ్ బక్తిసిల్లి లోకుర్ అయావలె పాడాజి సొనార్.

8 నాను ప్రేమిసిని తంబెరుజాండె, దిని వందిజ్ పొస్కాట్. ప్రబు ఎద్రు ఉండ్రీ రోజు వెయి పంటెజ్ లెకెండ మనాద్. వెయి పంటెజ్ ఉండ్రీ రోజు లెకెండ మన్నె.

9 ప్రబు ఒట్టు కితి లెకెండ్ మరజి వాదెజ్ ఆలస్యం ఆజినాద్ ఇజి సెగొండార్ ఒడెబిజినార్. గాని ఎయెర్బా పాడాజి సొన్ఎండ, విజేరె పాపమ్కు డిసి మన్సు మారిస్టెజ్ ఇజి మీ వందిజ్ ఓరిస్త మనాన్.

10 గాని ప్రబు మరజి వాని దినం తప్ఎండ వానాద్. ఒరెన్ డోజారి ఎస్తివలె వానండ్రో ఇజి నెన్ఎండ వాని లెకెండ్ వానాద్. నస్తివలె ఆగాసమ్దు దీడిజిని వలె సిల్లెండ ఆనె. ఆగాసమ్దు మని విజు, సిసుదాన్ వేనె సొనె. బూమి ముస్కు మనికెజ్ విజు వేనె సొనె.

11 విజు యా లెకెండ్ పాడానె సొనె. అందెజె మీరు దేవుణు వందిజ్ కేట ఆతి లోకుర్ ఆజి దేవుణు వందిజ్ బక్తిమన్ని లోకుర్ ఆజి బత్కిదు.

12 దేవుణు వాని రోజు వాదెజ్ ఇజి మీరు ఎద్దు సుడెజినిదెర్. అయ్యా దినం బేగినె వాదెజ్ ఇజి మీరు గటిజి పణి కిదు. అయ దినమ్దు ఆగాసమ్కు దని లోఇ మనికెజ్ విజి సిసుదాన్ వేనె సొనె. అయ సిసు వేడిదిజ్ విజు కర్జిజి సొనె.

13 గాని దేవుణు ఒట్టు కితి నని కొత్త ఆగాసమ్దిజ్, కొత్త బూమిదిజ్ మాటు ఎద్దు సుడెజినాట్. బానె విజు నీతి నజాయితి పూర్తి మంజినాద్లె.

14 అందెజె నాను ప్రేమిసినికిదెరా, మీరు ఇని తపు సిల్లెండ, ఇని పాపమ్బా సిల్లెండ దేవుణు ఎద్దు నండో కన్టబాడిజి మండ్రు. దేవుణు వెట నిపాతిదాన్ మండ్రు. ఎందనిజ్ దేవుణు ఒట్టు కితి మన్ని దన్నిజ్ మీరు ఏద్దు సుడెజినిదెర్.

15 యాక నెస్సు. దేవుణు మా వందిజ్ ఎందనిజ్ ఓరిస్త మనాన్. ఇహిజ మాటు పాపం డిసి మన్సు మారిస్టెజె ఇజి. మాటు ప్రేమిసిని అన్న పవులుబా దేవుణు సితి గెణమ్దాన్ వినుక వందిజ్ రాస్త మనాన్.

16 పవులు రాస్తి విజు ఉతరమ్క లోఇ యా లెకెండ్నె రాస్త మనాన్. వన్కా లోఇ సెగం అర్దం కిదెజ్ కన్టం ఆతికెజ్. వనక వందిజ్ నెన్ఇకార్, దేవుణు ముస్కు మన్ని నమకమ్దు ఇత్తాల్ ఆత్తాల్ దుజ్నికార్ అయ మాటెజ అర్దం మారిసినార్. మహి దేవుణు మాటెజ లోఇ మన్ని సెగమ్కుబా మారిసినార్. దిన్ని వందిజ్ వారు నాసనం ఆన సొనార్.



17 నాను ప్రేమినినికిదెరా, మీరు యా సజతిజ్ ముజాలె నెసి మనిదెర్. అందెజె జాగర్త మండ్రు. దేవుణు రూలుజ లోజిఇకార్ వెప్పిని తపు బోదెజాణిజ్ మొసెం కిబె ఆమాట్. ఎందనిజ్ ఇహిజ వరి బోదెజ్ మీ స్తిరం ఆతి మన్నిజ కల్లిస్సాద్.

18 గాని మీరు మా ప్రబు రక్సిస్సికాన్ ఆతి యేసు క్రీస్తు సిత్తి వన్ని దయా దర్మదాన్, గెణమ్దాన్ నెగ్రెండ పిరిజి మండ్రు. వన్నిజ్ ఏలుని, మరి ఎల్లకాలం గవరం కల్లిపిద్. ఆమెన్.

**Konda: కొండ బాసడు నెగ్గి కబ్బు**  
**Konda Dora New Testament which was published in**  
**2006**

copyright © 2006 Wycliffe Bible Translators, Inc.

Language: Konda-Dora

Contributor: SIL International (in Asia)

All rights reserved.

2025-05-06

---

PDF generated using Haiola and XeLaTeX on 6 May 2025 from source files  
dated 7 May 2025

840896da-3a66-5e43-9018-4a95a349d60c